

La "cuistion ladine"

ar sierâ cheste panoramiche essenziâl su la storie e sui caratars lenghistics dal furlan, e merete almancul nomenade chê che i studiôs a cognossin par 'cuistion ladine'. In dî di vuê cun 'ladin' si intint, in sens stret, un grup di dialets alpins che si dan dongje ator dal massiç dolomitic dal Sella (vals di Badie, Fasse, Gardene, Marebbe, Livinallongo).

Il famôs glotolic gurizan Graziadio Isaia Ascoli, che al à tacât i studis di lenghistiche in Italie, tai siei fundamentâi Saggi ladini (1873), publicâts tal numar di scree de riviste «Archivio Glottologico Italiano», nus da une cuantitât straordinarie di materiâi pe descrizion no dome di chestis varietâts isoladis, ma ancje di tantis altris fevelis alpinis e subalpinis - plui di dut dal lombart e dal venit, in plui che naturalmentri dal furlan e dal rumanç dai Grisons de Svizare. Il lavôr descritîf al è quartât indevant di Ascoli cun atenzion particulâr a cierts elements carateristics des fevelis alpinis, che l'autôr al identifiche par 'ladins' (par esempi il plurâl sigmatic, la conservazion di l tai grups pl e cl, la palatalizazion di c devant di a, che o vin za presentât).

La discussion lungje che e je tacade dopo de publicazion dal lavôr di Ascoli, e che e passe cul non di 'cuistion ladine', e à cjàpât e apassionât lis vôs plui impuartantis dal Nûfcent, metint une cuintri di chê altre une scuele di pinsîr 'austriache' e une 'taliane'. Cheste discussion – ancjemò vive – e tocje, in specie, la pussibilitât che la sostanziâl condivizion di cierts trats fonetics e basti par fâ la ipotesî, o ben e implichî, ancje une plui fonde unitât di sostrât, di caratar storic, etnic o di altre fate.